

PEACE DAY

MZP chuan Mizoram-in a remna leh muanna a neih champhaphak vawi 39-na, "Remna Ni" 2025 lawm leh turin inbuatsaihna a kalpui mek.

Mizorama remna leh muanna a thlen theihna atana sorkar laipui leh khatihlai a rammu MNF-te'n inremna thuthlung an ziah champhaphak chu June ni 30 hian Aizawl Lammual-ah MZP huaihawtin hman a ni leh dawn a. MZP thuchhuahin a tarlan danin Remna Ni lawmna-ah hian chief minister Pu Lalduhoma chu khuallian a ni ang a, Sikul hrang hrangin cheraw kanin, zai leh lam leh thusawina bakah lemchan te a awm ang. Rev. Dr. Lalmangaiha Council of Churches in Mizoram General Secretary in hunserh a hmang dawn a. MZP chuan Mizo mipui zawng zawng he hun hmang tur hian a sawm a, sawrkar mi pawimawh, tlawmngai pawl hrang hrang, kohhran hrang hrang, zirna in zawng zawng leh Politicial Party tinte he hun hmang tur hian a sawm a ni.

An thuchhuah chuan remna thuthlung ziahna hi kum 39 lai ral tawh mahse a hlutna a la ngai reng a ni an ti a. Kum 20 teh meuh hreawm leh harsa taka Mizo mipuite an awm hnuah Mizo mipuite tawngtai chhuah a nih avangin, theih ang tawka lawm hi a phu a. Zirlaite phei chu a hlut zia leh Mizote hun pawimawh a nih zia kan inhrilh thar zel a tul takzet a ni, an ti. He Remna Ni hi political party hrang hrangte, pawl hrang hrang leh mipui-in a hlutna ang taka an hman theih na'n political party awn lam nei lo MZP chuan kum 2018 atang khan a lawmna a buatsaih tan a, kum tin buatsaih a la ta zel a ni an ti bawk.



RAILWAY

Kilometre 51 leh metre 38 a thui Bairabi leh Sairang inkar rel kawng chu Prime Minister Pu Narendra Modi-a'n a hawn rin a ni. Northeast Frontier Railway (NRF) hotute chuan he lai rel kawng hi siam zawh tep a nih tawh thu leh a remchang chuan Prime Minister-in a hawn ngei an rin thu an sawi a. Mahse, Ministry of Railways atanga thu chiang a awm hma chuan an la sawi fak theih rih lo niin an sawi. Puan tawh angin Commissioner of Railway Safety (CRS) Northeast Frontier Circle Pu Sumeet Singhal chuan June ni 6 leh ni 10 inkar chhung khan Hortoki leh Sairang rel chawllhmun inkara rel kawng a him tawk leh him tawk loh hi uluk takin a endik a. A him tawkah a ngai ni a thudawn a nih lai-in a report thehlhna Ministry of Railways in a pawm leh pawm loh hriat a la ni lova, an puan thuai beisei a ni. Pu Singhal hian nikum July thla khan Bairabi leh Sairang inkar rel kawng him leh him loh a endik tawh a, a him tawk ti a report a pek chu Ministry of Railways chuan nikum vek August thla bul lam khan a lo pawm tawh a ni. Cheng vaibelchhe 5,021 leh nuai 45 ruahmanna hmanga hnathawh Bairabi leh Sairang inkar rel kawng lian hnathawhna atan hian sum za zela 97 hman a ni tawh a, a taka thawh chin hi za zela 94 point 5 a ni tawh bawk a. Ministry lam pawhin hna hi thawh zawh tep a nih thu leh chak taka thawh chhunzawm zel a nih thu an sawi a. July thla chhung hi chuan hawn theiha zawh fel vek hman an beisei a ni.



COVID

Ram chhung hmun dangah leh hmar chhak state thenkhatah a tam chhoh viau tawh lai-in Mizoramah chuan kuminah 2 chauh hri kai an la awm. Thenawm Manipur state-ah January thla atanga vawiin thlenga Covid hri kai 98 an tlin tawh lai-in Mizoramah chuan kuminah 2 chauh kai thar an la awm a. He'ng mi 2-te hi Aizawl district a cheng an ni a, Zoram Medical College & Hospital-a enkawl an nih hnu-ah June ni 5 khan dam takin damdawi-in an chhuahsan leh tawh a ni. Heti chung hian Integrated Disease Surveillance Programme (IDSP) hnathawkte chuan Covid dinhmun hi chik taka an ngaihven reng thu leh central sorkara Ministry of Health & Family Welfare thuneitute nen an inbiak pawh reng thu an sawi a. A tul dan a zira Mizoram pawn atanga lo lutte lo endik pawh kalpui thei turin ruahmanna siam turin an inpeh reng niin an sawi a ni. Kum 2020 bul lam atanga Covid hri a len tan atanga tun thleng hian Covid hri kai a rinhlelh sample nuai 19, sing 9, sang 7 leh 619 endik a ni tawh a. Endik zinga mi nuai 2, sing 3 sang 9 leh 637 te chuan Covid an kai tih hmuhchhuah a ni a. An zinga mi 734 te chuan Covid hri hi an thihpui a, mi nuai 2, sing 3, sang 9 leh 903 te erawh chu enkawl dam an ni thung.



AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah thin a ni. Zanin dar 6 leh a chanve-ah Chanchintha puan leh a ni ang.

